

## Banc Bia

### Ceist 1

Beidh tú ag féachaint ar ball ar thuairisc faoi bhanc bia i gCorcaigh. Sula bhféachfaidh tú ar an mír, an féidir leat na focail/frásaí ar chlé a mheaitseáil leis na focail/frásaí ar dheis?

1. ag freastal	a) <i>struggling</i>
2. ag fulaingt	b) <i>in the grip of poverty</i>
3. i ngreim ag an mbochtanas	c) <i>on a weekly basis</i>
4. ar an meán	d) <i>the higher education sector</i>
5. tionóntaí	e) <i>living costs</i>
6. ag streachailt	f) <i>attending, at</i>
7. costais mhaireachtála	g) <i>on average</i>
8. ar bhonn seachtainiúil	h) <i>grants</i>
9. deontais	i) <i>suffering</i>
10. an earnáil ardoideachais	j) <i>tenants</i>

1	2	3	4	5	6	7	8	9	10

Cad a bhí ag an duine in aice leat?

Anois, féach ar an tuairisc den chéad uair le feiceáil an féidir leat na focail sin a aithint sa mhír nuachta.

### Ceist 2

Féach ar an tuairisc den dara huair agus labhair leis an duine in aice leat faoi ábhar na míre.



### Ceist 3

Féach ar an tuairisc arís agus freagair na ceisteanna:

1. Cé mhéad mac léinn atá ag baint úsáid as an mbanc bia faoi láthair?
2. Cé mhéad atá ar chíos, ar an meán, i gCorcaigh?
3. Cá bhfuil an banc bia lonnaithe?
4. Cén fáth ar luadh an deontas SUSI (Tacaíocht Chomhchoiteann do Mhic Léinn in Éirinn) sa tuairisc?

**Ceist 4** '...as an mbanc bia...'

Féach ar na samplaí seo ar fad den tuiséal tabharthach a bhí le cloisteáil sa mhír. Bain amach na lúibíní agus déan cibé athrú is gá ar an ainmfhocal. Féach ar an sampla thuas chun cabhrú leat.

ar an (Ollscoil)	_____
ag an (bochtanas)	_____
ar an (méid)	_____
ar an (meán)	_____
ar an (céad) dul síos	_____
san (áireamh)	_____
ar an (cíos)	_____
leis an (costas maireachtála)	_____
as an (seirbhís)	_____
ar an (earnáil)	_____
leis na (costais mhaireachtála)	_____

**Ceist 5** An Banc Bia

Samhlaígh go bhfuil sibhse in bhur n-oifigigh leasa d'Aontas na Mac Léinn. Cad a chuirfeadh sibh i mála bia do mhac léinn amháin le haghaidh seachtain amháin.

**Ceist 6** Pléigh na ceisteanna leis na daoine eile i do ghrúpa:

1. Ar cheart go mbeadh oideachas tríú leibhéal saor do chách?
2. Cad iad na fadhbanna is mó a bhíonn ag mic léinn tríú leibhéal nuair a thosaíonn siad ar an ollscoil ar dtús?
3. Conas a bhíonn saol na meánscoile éagsúil ó shaol na hollscoile?

**Treoracha agus Freagraí**

**Ceist 1**

1	2	3	4	5	6	7	8	9	10
f	i	b	g	j	a	e	c	h	d

**Ceist 2**

Is cleachtadh cainte é seo. Tabhair deis do na foghlaimeoirí an méid a thuig siad faoin mír a phlé le chéile. Pléigh ábhar na míre leis an rang iomlán ansin.

**Ceist 3**

Féach an script.

**Ceist 4**

- as an **m**banc bia
- ar an Ollscoil
- ag an **m**bochtanas
- ar an méid
- ar an meán
- ar an **g**céad dul síos
- san áireamh
- ar an **g**cíos
- leis an **g**costas maireachtála
- as an **t**seirbhís
- ar an earnáil
- leis na costais mhaireachtála

**Ceist 5**

Cuir an bia a roghnaigh gach beirt i gcomparáid. Déan iarracht plé a chothú ar cad é an bia is fearr le cur sna málaí.

**Ceist 6**

Is féidir gach grúpa a chur ag déanamh an phlé seo agus ansin na tuairimí a phlé leis an rang iomlán.

**Siún Nic Gearailt**

Tá suas le 20 mac léinn ag baint úsáid as an mbanc bia atá bunaithe i gColáiste na hOllscoile, Corcaigh gach seachtain. Deir Aontas na Mac Léinn go bhfuil go leor daoine óga atá ag freastal ar an Ollscoil i gCorcaigh ag fulaingt agus go bhfuil cuid acu i ngreim ag an mbochtanas.

**Marian O’Flaherty**

Tháinig méadú 7% ar an méid cíosa a bhí á íoc ar lóistín i gCathair Chorcaí an bhliain seo caite. De réir figiúirí nua-fhoilsithe, €1,177 in aghaidh na míosa an méid cíosa ar an meán atá á íoc ag tionóntaí i gCathair Chorcaí, beagnach €300 in aghaidh na seachtaine. Agus, tá sé seo ag cur isteach go mór ar dhaoine óga a thagann go Corcaigh chun freastal ar an Ollscoil.

Mar sin, bheartaigh Aontas na Mac Léinn i gColáiste na hOllscoile, Corcaigh, banc bia a bhunú.

Tá an banc bia lonnaithe anseo ag foirgneamh Aontas na Mac Léinn in UCC.

**Naoise Ó Cruadhlaoi, Oifigeach Leasa, Aontas na Mac Léinn**

Ar an gcéad dul síos, is fadhb mhór é cruatan airgeadais do mhic léinn na tíre seo, mic léinn in UCC san áireamh. Bíonn daoine ag streachailt leis na costais mhaireachtála agus tháinig méadú 7% ar an gcíos i gCorcaigh anuraidh. Cuireann sin an-chuid brú ar dhaoine agus is fíor a rá go bhfuil daoine ag streachailt leis an gcostas maireachtála.

**Marian O’Flaherty**

Tá suas le 20 mac léinn ag baint úsáid as an tseirbhís ar bhonn seachtainiúil ach tá an uimhir sin ag méadú. Fadhb eile, a deir mic léinn i gCorcaigh – nach bhfuil méadú tagtha ar dheontais SUSI le beagnach 8 mbliana.

**Naoise Ó Cruadhlaoi, Oifigeach Leasa, Aontas na Mac Léinn**

Tháinig laghdú 43% ar mhaoiniú ardoideachais sa tír seo le deich mbliana anuas. Tá sin ag cur an-chuid brú ar an earnáil ardoideachais agus níl na deontais SUSI ag dul in airde leis na costais mhaireachtála.

Marian O’Flaherty, Nuacht TG4 i gCathair Chorcaí